

**PROXECTO DE DECRETO POLO QUE SE MODIFICA O DECRETO 42/2001,
DO 1 DE FEBREIRO, DE REFUNDICIÓN EN MATERIA DE AXENCIAS DE
VIAXES, GUÍAS DE TURISMO E TURISMO ACTIVO.**

De conformidade co disposto no artigo 27.21 do Estatuto de Autonomía, a Comunidade Autónoma de Galicia ten atribuída a competencia exclusiva en materia de promoción e ordenación do turismo no seu ámbito territorial.

O día 20 de febreiro de 2001 publicouse no Diario Oficial de Galicia, núm. 36, o Decreto 42/2001, do 1 de febreiro, de refundición en materia de axencias de viaxes, guías de turismo e turismo activo. Este decreto perseguía regular tres sectores específicos: as axencias de viaxes, os/as guías turísticos/as e o turismo activo.

Respecto á regulación das axencias de viaxes, unha das súas actividades propias é a relativa á organización e venda das denominadas “*viaxes combinadas*”.

A Directiva 90/134/CEE, do 13 de xuño de 1990, relativa ás viaxes combinadas, ás vacacións combinadas e aos circuítos de vacacións, establecía no seu artigo 7 a obriga para o organizador e/ou retalista que foran parte no contrato, de facilitar probas suficientes de que, en caso de insolvencia ou quebra, o reembolso dos fondos depositados quedarían garantido, xunto coa repatriación das persoas consumidoras.

O artigo 163 do Real Decreto Lexislativo 1/2007, do 16 de novembro, polo que se aproba o texto refundido da Lei xeral para a defensa dos consumidores e usuarios e outras leis complementarias foi modificado pola Lei 15/2015, do 2 de xullo, de xurisdición voluntaria, co obxecto de cumprir o mandato recollido na sentenza do Tribunal de Xustiza da Unión Europea e no informe de 1999 da Comisión Europea sobre a transposición da Directiva 90/134/CEE, do 13 de xuño de 1990.

Unha vez modificado o Texto refundido da Lei xeral para a defensa dos consumidores e usuarios e outras leis complementarias, procede modificar o Decreto 42/2001, do 1 de febreiro, de refundición en materia de axencias de viaxes, guías de turismo e turismo activo, co obxecto de adecualo aos pronunciamentos da Unión Europea sinalados e dar cumprimento ao mandato xurisdiccional.

Polo exposto, o decreto adecúase aos principios de necesidade, eficacia, proporcionalidade, seguridade xurídica, transparencia, e eficiencia, establecidos no artigo 129 da Lei 39/2015, do 1 de outubro, do procedemento administrativo común das Administracións Públicas, como principios de acordo cos que as Administracións Públicas actuarán no exercicio da iniciativa lexislativa e a potestade regulamentaria.

Este decreto consta dun artigo único, no que se da nova redacción ao artigo 16 do Decreto 42/2001, de refundición en materia de axencias de viaxes, guías de turismo e turismo activo, e unha disposición derradeira única.

O decreto foi sometido ao preceptivo informe do Consello do Turismo de Galicia, así coma a consulta das organización máis representativas do sector e do Consello Galego de Consumidores e Usuarios.

En consecuencia, por proposta do vicepresidente e conselleiro de Presidencia, Administracións Públicas e Xustiza, de acordo co ditame do/oído o Consello Consultivo de Galicia, e logo da deliberación do Consello da Xunta de Galicia na súa reunión do día

DISPOÑO:

Artigo único. *Modificación do Decreto 42/2001, do 1 de febreiro, de refundición en materia de axencias de viaxes, guías de turismo e turismo activo*

O artigo 16 do Decreto 42/2001, do 1 de febreiro, de refundición en materia de axencias de viaxes, guías de turismo e turismo activo, queda redactado da seguinte maneira:

Artigo 16. *Garantías*

1. As empresas organizadoras e as retallistas de viaxes combinadas están obrigadas a constituír, con carácter previo ao exercicio da súa actividade, e manter de xeito permanente unha garantía para responder con carácter xeral do cumprimento das obrigas derivadas da prestación dos seus servizos fronte ás persoas contratantes dunha viaxe combinada e, especialmente, en caso de insolvencia, do reembolso efectivo de

todos os pagamentos realizados polas persoas viaxeiras ou por unha terceira persoa no seu nome, na medida en que non se prestaran os servizos correspondentes e, no caso de que se inclúa o transporte, da repatriación efectiva daqueles, sen prexuízo de que se poida ofrecer a continuación da viaxe.

Para estes efectos, a insolvencia entenderase producida tan pronto como, a consecuencia dos problemas de liquidez da empresa organizadora ou da retallista, os servizos da viaxe deixen de executarse, non vaian a executarse, vaian a executarse só en parte, ou cando as empresas prestadoras de servizos esixan o seu pagamento ás persoas viaxeiras.

Producida a insolvencia, a garantía deberá estar dispoñible, podendo a persoa viaxeira acceder facilmente á protección garantida.

2. A garantía prevista no número anterior pode revestir tres formas:

a) **Garantía individual:** mediante un seguro, un aval ou outra garantía financeira. Durante o primeiro ano de exercicio da actividade, esta garantía debe cubrir un importe mínimo de 100.000 euros. A partir do segundo ano de exercicio da actividade, o importe desta garantía debe ser equivalente, como mínimo, ao 5% do volume de negocios derivado dos ingresos por venda de viaxes combinadas acadado pola empresa organizadora ou retallista no exercicio anterior, sen que en ningún caso o importe poida ser inferior a 100.000 euros.

Esta cobertura deberá adaptarse no caso de que aumenten os riscos, especialmente se se produce un incremento importante da venda de viaxes combinadas.

b) **Garantía colectiva:** as empresas organizadoras e retallistas poden constituír unha garantía colectiva, a través das asociacións empresariais legalmente constituídas, mediante achegas a un fondo solidario de garantía.

A contía desta garantía colectiva será dun mínimo do 50% da suma das garantías que as empresas organizadoras ou retallistas individualmente consideradas deberían constituír de acordo co apartado anterior. En ningún caso o importe global do fondo poderá ser inferior a 2.500.000 euros.

c) **Garantía por cada viaxe combinada:** a empresa organizadora ou retallista organizador contrata un seguro para cada persoa usuaria da viaxe combinada.

3. No momento no que a persoa viaxeira efectúe o primeiro pagamento a conta do prezo da viaxe combinada, a empresa organizadora ou, no seu caso, a retallista, facilitaralle un certificado que acredite o dereito a reclamar directamente ao que sexa garante no caso de insolvencia, o nome da entidade garante e os seus datos de contacto.

4. Cando a execución da viaxe combinada se vexa afectada pola insolvencia da empresa organizadora ou da retallista, a garantía activarase gratuitamente para as repatriacións e, en caso necesario, o financiamento do aloxamento previo á repatriación. Os reembolsos correspondentes a servizos da viaxe non executados efectuaranse nun prazo non superior a un mes previa solicitude da persoa viaxeira.

5. Para os efectos deste artigo entenderase por repatriación o regreso da persoa viaxeira ao lugar de saída ou a calquera outro lugar acordado polas partes contratantes.

Disposición derradeira única. *Entrada en vigor*

Este decreto entrará en vigor aos vinte días da súa publicación no Diario Oficial de Galicia.

Santiago de Compostela,

Alberto Núñez Feijóo

Presidente

Alfonso Rueda Valenzuela

Vicepresidente e Conselleiro de Presidencia, Administración Públicas e Xustiza